

Goibekokale

ELGETA / Barikua / Egubakoitza / 2005eko azaroaren 11 / 246. zenbakia

KOORDINATZAILEA: Irati Agirreazaldegia • Barrenkalea 33 BERGARA 20570 • Tel.: 943 25 05 02 • Faxa: 943 25 05 13 • Posta elektronikoa: goibekokale@goiena.com • Lege gordailua: SS475/95


Aguirre y Aranzabal armagintzako lantegi aitzindaria aurki eraitsiko dute

IRATI AGIRREAZALDEGI

Herrirako sarreran, ezkerrean dagoen fabrika zaharra aurki botako dute. Garai batean eskopeta fabrika izandakoa, ondoren Udalaren biltegi ere izan zen. Elgetako industriaren gune bat aurki eraitsiko dute, eta Torrealdeko etxeak egingo dituzte hantxe.

Elgetako industria mugimenduan garrantzia izan zuen Eibarko armagintza enprekin izandako harremanak. Elgetako gazte asko Eibarrera joan zen XIX. mendearen bukaeran lanbide bat ikasteko, eta armagintzaren sektorean nabarmentzen hasi ziren laster. Horietako gazte batek, Udariaga baserrian jaiotako Nikolas Arantzabalek, Agirrerekin batera eskualdeko armagintza sektoreko enpresa garrantzitsuenetakoa izango zenaren zimenduak osatu zituen.

Aguirre y Aranzabal (AYA) Elgetako lantegia 1952an zabaldu zuten, eta ondoren, 1975ean elkarre anonimo bihurtu zen. Fabrikari 15 langilek jardun zuten urte haietan eskopetak egiten, 1985ean lantegiak atek itxi zituen arte.



Aguirre y Aranzabal lantegiak atek itxi ostean, Udalak biltoki moduan erabili du eraikina.

EIBARKO LANTEGIA

Aguirre y Aranzabal lantegi nagusia Eibarren zegoen eta garai hartan 400 langile inguru izatera iritsi zela esan digute.

Gaur egun, AYA izenpean eskopetak egiten jarraitzen duten arren, enpresa beste jabe batzuen esku dago. Eibarren du egoitza, Otaola ibilbidean.

ARMAGINTZA ELGETAN

Aguirre y Aranzabal lantegia aitzindari izan bazen ere, armagintzak izan du bere lekua Elgetan. Gaur egun oraindik Zabala

AYA fabrikak 1985ean itxi zituen atek, baina oraindik bada arma lantegirik herrian

Hermanos enpresak eskopetak egiten ditu eta familiarreko beste bi enpresa txiki ere badira armagintzan jarduten dutenak. Aguirre y Aranzabal enpresak Elgetako lantegia utzi zuenean eraikina enkantera atera zuten eta 1991. urte hasieran Udalaren esku gelditu zen.

Udalak biltegi moduan erabili du hainbat urtean AYA eraikina, eta hango solairuren bat alokatuta ere izan dute beste jarduera batzuetarako. Pinak egiten dituen enpresa bateko langileek jardun zuten hantxe denboraldi batez; gaur egun, Pagatzako industrialdean dute lantegia.

Orain hutsik dago AYA lantegi zaharra eta aurki eraistekotan dira, Torrealdeko urbanizazio lanei urtea amaitu aurretik ekingo dietela esan baitute.

HERRITARREN HITZA / Geaxi Ezpeleta • Ikaslea

Zigorra baino gehiago

Hiru, bi, bat, heldu da eguna! Hainbat eta hainbat Euskal Herritarrek itxaroten duten egun hori. Autoa hartu, barrua kemenez bete eta bideari ekitekoa. Urrunean irribarre baten gose diren horienganako bide luzea. Kilometro ugari eginak eta beste asko egitekoak, gehiegi.

Urrunean, bestalde, zain dagoenaren egonezina. Beldurra eta poza bihotzean borborra. Bisita jasotzearen poza, bideak suposatzen duen arriskuarekiko beldurra. Bakardadean itxaron ostean, inguruko gertutasunak suposatzen duen poza. Berriz

bakardadean itxaron beharrak barruan zabaltzen duen beldurra.

Egoera latza. Sasiz eta arantzaz betetako bidea. Denentzat jasangaitza, batzuentzat jasan ezina.

Urruntasunak, ziega hotzaren oihartzunak, jasan beharreko irainak, zigor batetik haratago doazen egoerak dira.

Ingurukoak heriotzaren errepidera behartzen dituen



“Ez gara politikaz hitz egiten ari, eskubideez hitz egiten ari gara”

zigorra, presoak etsipenera bultzatzen dituen zigorra. Gobernuek norbanakoen eskubideak urratuz inposatzen duten zigorra. Alderdi politiko gehienei esker ezartzen jarraitzen den zigorra.

Errepidean nahiz herritik kanpo urruneko ziega bakartian

bizia galdu dutenendako zigor hutsa baino askoz gehiago, heriotza zigorra.

Euskal Herriak jasaten duen errepresioaren adar gogorretako bat dira espetxe politika eta dispersioa. Legeak dioena urratuz inposatzen den egoera.

Ez gara politikaz hitz egiten ari, eskubideez hitz egiten ari gara. Presoen eskubideez, presoengurukoaren eskubideez, herri bati herri izan nahiagatik urratzen zaizkion eskubideez. Bermatuak egon beharko luketen eta ez dauden giza eskubideez. Agintariek, boteredunek bermatu beharko lituzketen eta horren ordez urratzen dituzten eskubideez.

LABUR

Edurne Pasabanen diapositiba saioa, bertan behera

Azaroaren 17rako Udalak eta Kutxak elkarlanean antolatutako diapositiba emanaldi bertan behera geratu dela esan digute udaletxean. Edurne Pasabanek *Emakumea eta K2* izenburupean egin behar zuten saioa zen, hain zuzen ere. Horren ordez beste mendiko diapositiba emanaldi bat antolatatu dute abenduaren 1erako. Alberto Inurrategik *Gure Himalaya* diapositiba saioa eskainiko du; eta baita mendian pasatako gorabeherak kontatu ere.

KULTURA

Zeramika eta margo erakusketa Espaloian hilaren 27ra arte

I.A. Kulturarekin bi hitzordu dituzte asteburuan elgetarrek Espaloian. Gaur, barikua, Zanguango taldearen antzezlanaz izango da. Bihartik aurrera, bestalde, erakusketa berri bat izango da ikusgai kafe antzokian Jennifer Alvaradoren zeramika eta margo lanekin.

Zanguango konpainiak irekiko du Espaloiko asteburua Max antzerki saria irabazi duen *Pan con pan* lanarekin. Ikuskizuna gaur, barikua, izango da 22:30ean. Sarrerek 12 euro balio dute, bazkideendako, berriz, 10 euro.

Bestalde, bihar, zapatua erakusketa berri bat ipiniko dute ikusgai Espaloian. Arte Ederretan lizentziatu berri den Jennifer Alvarado durangarraren zera-


mika eta margo lanak azaroaren 27ra arte egongo dira bertan.

MARGO TEKNIKA ANITZAK

Zeramika lanak buztin gorritz eta toskaz eginikoak dira; 2004an Getxo Arteko erakusketan ikusgai ipinitakoak. Margoak, berriz, teknika desberdinak nahastuz eginak. Orain arte talde erakusketetan hartu du parte artista honek, baina honakoa bakarkako erakusketa izango du. Aste barruan Espaloira joaten diren guztiek ikusi ahal izango dituzte arte lan hauek.

Domekan, familiarendako zinema saioa izango da. 17:30ean *Los increíbles* marrazki bizidun filma emango dute.

Astean, nagusiendako zinema emanaldiek hartuko diete lekukoa asteburuko saioei. Eguaztenean, hilaren 16an, *Vias*



Mi huerto Alvaradoren lana.

GOIBEKOKALE.

cruzadas filma amerikarra emango dute. Film honek hiru pertsonen tren geltoki batean duten harremana kontatuko du.

UDALAREN WEBGUNEA

Webguneak 65.265 bisita urtebetean

I.A. Atzo, azaroak 11, bete ziren hiru urte Elgetako Udalak webgune berritua aurkeztu zuenetik. Goienak kudeatzen du eta besteak beste herriko berriak eta herria bera sare bidez zabaltzea du helburu, azken urtean webguneak 65.000 bisitatik gora jaso ditu.

Elgetako Udalaren webgune berritua 2002ko azaroaren 10ean abian jarri zutenetik, urtetik urtera gero eta bisita gehiago izan ditu. Lehen urtean 27.200 bisita jaso bazituen, joan zen azarotik hona jasotakoak 65.266 izan dira.

Goienako telematika sailak kudeatzen du webgune hau Udalarekin elkarlanean eta bertatik esan digutenez, "albisteak eta agenda kontsultatzen ditu jen-

deak batez ere; herria eta turismoa atalek ere pizten dute jendearen interesa".

MAIATZEAN ORRI GEHIEN

Egunean bataz beste 191 bisita izaten ditu Elgetako Udalaren webguneak eta gehienek orri bat baino gehiago bisitatzen dute bertan. Horren adierazgarri dira datuak: Bisitak 65.266 izan badira ere ikusitako orriak 181.680 dira.

Bisita gehien apirillean jasotzen dituzten webguneak, 6.436, hain zuzen ere. Jendeak Elgetako webgunean orri gehien ikusi duen hilabetea, berriz, maiatza da. Bali-teke arrazoia izatea hilabete honetan futbito txapelketako emaitzak bertan ipini izana.

Hemendik aurrera ere Elgetako berriak jaso nahi dituztenek www.elgeta.org helbidean horretarako aukera edukiko dute.



Besaidera joan ziren mendi bizikletan 18 elgetar

Kirola Sustatzeko Taldeak antolatuta mendi bizikleta ibilaldia izan zen domekan. 18 lagunek hartu zuten parte eta proposatutako bi ibilbideen artean laburrena aukeratu zuten: Elgeta-Berrio auzoa-Elorrio-Besaide-Kanpantzar-Elgeta. Bestalde, Kirola Sustatzeko Taldeak azaroaren 20rako eskola-umeendako eta euren familiendako irteera laburra antolatzen dihardu. Gatzaga aldera izango da seguru aski, baina zehaztasunak aurrerago emango dituzte./I.A.

LABUR

Azaroaren 16tik aurrera Bolatoki taberna, sauna eta squasha itxita egongo dira

Datorren azaroaren 16an itxiko ditu atek Bolatoki tabernak, beraz, ordutik aurrera ez da taberna eta jatetxe zerbitzurik egongo kiroldegian. Taberna itxteaz bat sauna eta squash pista ere ezin izango dira erabili. Hala ere, Udal Kirol Zerbitzuak eskaintzen dituen ikastaroak (sasoian egoteko gimnasia, erretiratuendako gimnasia, tai-chi, aerobik eta eskola kirola) kiroldegiko gimnasioan egiten jarraituko dute, irakasleek zabaldu eta itxiko baitituzte instalazioak. Udalaren asmoa da kirol instalazio guztiak lehenbailehen berriz irekitzea.

Baserrietako postontziak datorren urtean tokiz aldatzeko proposamena egingo dute

Baserritarrek udaletxe azpiko postontzietan jasotzen dituzte orain gutunak. Astelehenean izandako Baserritarren batzordeko bileran, ordea, adostu zuten datorren urteko aurrekontuei begira proposamen bat aurkeztea postontziak lekuz aldatzeko. "Udaletxe azpiko postontziak oso egoera kaskarrean daude; gainera, neska-mutikoak jolasean ibiltzen dira eta sarritan gutunak lurrean aurkitu izan ditugu", esan digu batzordeko kide batek.

Euren asmoa da, datorren urtean, Udalaren biltokia berritzeko lanak egiten dituztenean, gune bat eskatzea baserrietako postontziak ipintzeko. "Baserritar bakoitzak bere postontzia eta giltza izango lituzke nahi dutenean gutunak jasotzeko", esan digu. Orain aztertu behar dute nolako postontziak ipini ditzaketen.

smsoinu

Poltsikoko telefonorako euskal soinu eta irudiak

SOINUAK: Bidali, SOINUE+hutsunea+KODEA
ABESTIAK: Bidali, SOINUP+hutsunea+KODEA
LOGOAK: Bidali, SOINUL+hutsunea+KODEA
JOKOAK: Bidali, SOINUJ+hutsunea+KODEA

7505

zenbakira

Deiaren prezioa:
0,90 + BEZa

OHARRAK

1. **BATERAGARRITASUNA:** Begiratu zure poltsikoko telefonoa bateragarria den eskaintzen ditugun produktuekin, helbide honetan: www.smsoinu.com/bateragarri. Bertan jasoko duzu beharrezko duzun informazio guztia.
2. **BALINTZAK:** Edukiak eskuratzeke, beharrezkoa da GPRS sistema aktibatuta izatea. GPRS sistema aktibatutako jarraitze zure hornitzailearekin harremanetan. Alta emateko duan da eta ko-jarraitze bakoik ordaindu behariko duzu. Kasu guztietan deia eta GPRS sistemari alta emateko deitu dira. * Euskaltel: deitu 900 84 02 00 telefonora. / * Vodafone: deitu 123-ra. / * Movistar: deitu 609-ra.
3. **ZALANTZAK:** Edozein zalantza duzula, jarri gurekin kontaktuan: smsoinu@smsoinu.com / edo deitu 902 01 21 48 telefonora.
4. **PERTSONALIZAZIOAK:** Zure neurria egin ditzakegu abesti eta logoak. Webgune honetan kaleratu eta erabiltzaileek eskura dezatela nahi baduzu, jarri gurekin harremanetan eta deitu 902 01 21 48 telefonora.

...ASKOZ GEHIAGO GURE WEBGUNEAN www.smsoinu.com